

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst («Službene novine Zeničko-dobojskog kantona», broj 7/10), a u vezi sa članovima 29. i 49. stav (1) i (3) Zakona o izvršavanju Budžeta Zeničko-dobojskog kantona za 2012. godinu, („Službene novine Zeničko-dobojskog kantona“, broj: 5/12), Vlada Zeničko-dobojskog kantona, na prijedlog Ministarstva za privredu, na 68. sjednici, održanoj 28.06.2012. godine, d o n o s i

ZAKLJUČAK

o usvajanju Programa utroška budžetskih sredstva u 2012. godini

I.

Usvaja se Program utrošku budžetskih sredstava u 2012. godini, Ministarstva za privredu Zeničko-dobojskog kantona, u iznosu do 2.000.000,00 KM (slovima: dvamiliona konvertibilnih maraka), koji čini sastavni dio ovog zaključka.

II.

Sredstva iz tačke I. ovog zaključka realizovat će se u skladu sa odobrenim mjesečnim operativnim planovima, a usklađeno sa realizacijom ostvarenih javnih prihoda u prethodnom mjesecu, osim u slučajevima odobrenim posebnom odlukom Vlade Zeničko-dobojskog kantona.

III.

Zaključak stupa na snagu danom donošenja.

Broj: 02-_____ /12.
Datum, 28.06.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvo za privredu,
1x Ministarstvo finansija,
1x a/a.

PROGRAM UTROŠKA BUDŽETSKIH SREDSTAVA U 2012. GODINI

I. UVOD

Pravni osnov za donošenje Programa utroška budžetskih sredstava u 2012. godini – subvencije preduzećima u privatizaciji i podsticaj u industriji nalazi se u članu 29. i članu 49. stav (1) i (3) Zakona o izvršavanju budžeta Zeničko-dobojskog kantona za 2012. godinu („Službene novine Zeničko-dobojskog kantona“, broj: 5/12 od 27.04.2012.godine).

Ovaj program usaglašen je sa Akcionim planom iz Strategije razvoja Zeničko-dobojskog kantona za period 2010.-2020. godina, te sa nadležnostima Ministarstva za privredu.

II. IZVOR FINANSIRANJA

Budžetom Zeničko-dobojskog kantona za 2012. godinu, („Službene novine Zeničko-dobojskog kantona“, broj: 5/12 od 27.04.2012.godine), utvrđena su finansijska sredstva, ekonomski kod 614500 – Subvencije preduzećima u privatizaciji i poticaj u industriji u iznosu od 2.000.000,00 KM.

III. ALOKACIJA SREDSTAVA

Imajući u vidu raspoloživa sredstva, te obaveze koje proizilaze iz Programa rada Ministarstva za privredu i Programa rada Vlade Zeničko-dobojskog kantona, Ministarstvo za privredu je planiralo utrošak utvrđenih sredstava, na sljedeći način:

1. IZRADA STRATEGIJE RAZVOJA ENERGETIKE U ZENIČKO-DOBOJSKOM KANTONU

Iznos: 50.000,00 KM

Svrha:

Strategijom razvoja Zeničko-dobojskog kantona za period 2010.-2020. godina utvrđen je Akcioni plan u kojem su definisane, između ostalih, sljedeće obaveze Ministarstva za privredu:

1. Audit energetske efikasnosti za privredne subjekte i stanovništvo,
2. Oblikovanje strategije za razvoj novih energetskih potencijala,
3. Oblikovanje Strategija za korištenje obnovljivih izvora,
4. Oblikovanje energetske-ekološke strategije.

Kako je usvojena Strategija razvoja Federacije BiH, jasno je da je neophodno donijeti sličan dokument i na nivou Zeničko-dobojskog kantona. Imajući u vidu ovu činjenicu neophodno je pokrenuti propisane aktivnosti kako bi došlo do izrade Strategije razvoja energetike Zeničko-dobojskog kantona.

Zbog ograničenih nadležnosti Kantona, a imajući u vidu zahtjeve iz Strategije razvoja Zeničko-dobojskog kantona, odnosno iz Akcionog plana, Ministarstvo će pri izradi projektnog zadatka posebnu pažnju usmjeriti na ove činjenice. Dakle ovim će biti obuhvaćene 4 mjere iz Akcionog plana, što će stvoriti preduslove za njihovu implementaciju u narednim koracima.

Organizacija – primalac: Izvođač

Kriteriji: Javni poziv

2. RAZVIJANJE POSLOVNO-PREDUZETNIČKE INFRASTRUKTURE

Iznos: 60.000,00 KM

Svrha:

Svrha ovog programa kao prioritarnog cilja je osmišljeno razviti poslovno-preduzetničku infrastrukturu kao temelj razvoja konkurentne ekonomije i preduzetništva.

1. Ustroj optimizirane mreže preduzetničkih inkubatora unutar Kantona
2. Ustroj optimizirane mreže centara za podršku start-up, mikro i malim biznisima
3. Jačanje kapaciteta kantonalnih poslovno-preduzetničkih infrastrukturnih institucija

Budući da unutar Kantona već postoji određen broj preduzetničkih inkubatora, uključujući inkubator unutar zeničkog Univerziteta, bazni projekat trebao bi da bude prijedlog optimiziranog plana preduzetničkih inkubatora unutar Kantona (lokacija svakog inkubatora, djelokrug rada, detaljan plan uključujući i budžet). Nakon toga trebalo bi pristupiti ustroju novih inkubatora (svaki inkubator zaseban projekat) uz proaktivno učešće svih nosilaca (posebna uloga Univerziteta).

Druga aktivnost bi se realizirala kroz set međusobno koordiniranih projekata. Bazni projekat: utvrđivanje optimalnog broja centara, stepena pokrivenosti Kantona, pozicioniranje i djelokruga njihovog rada na opštinskoj razini.

Treća aktivnost se odnosi na jačanje kantonalnih poslovno-preduzetničkih infrastrukturnih institucija. Efektivne i efikasne kantonalne poslovno-preduzetničke infrastrukturne institucije (četiri institucije: kantonalna privredna komora, obrtnička komora, REZ i BSC – Biznis Servis Centar) su značajne za razvoj privrede Kantona.

Indikatori: Broj poduzetničkih inkubatora; broj biznisa unutar inkubatora; % biznisa koji je postao samoodrživ i broj centara; djelokrug rada centara; način podrške MSP i potencijalnih poduzetnika; broj usluga; ocjena njihovog rada od strane korisnika usluga.

Nosilac: Sektor trgovine, razvoja i obrta

Organizacija – primalac: Općine

Kriterij: Po Odluci Vlade Kantona

3. PROMOCIJA PODUZETNIŠTVA I PODUZETNIČKE KULTURE

Indikatori: Način promocije; broj MSP biznisa u kantonalnom BDP; godišnji prirast biznisa

Nosilac: Sektor industrije, energetike i rudarstva i Sektor trgovine, razvoja i obrta

3.1. Program finansiranja manifestacija, izdavačkih projekata i edukacije

Iznos: 30.000,00 KM

Svrha:

Podrška razvoju i zapošljavanju je višestruko kompleksan proces. Jedan od segmenata je i isticanje i promoviranje uspješnih menadžera, programa, investicija i slično.

Podsticanje poduzetništva je moguće i kroz izdavačke poduhvate. Na ovaj način se u raznim pisanim i drugim oblicima poduzetnicima saopštavaju značajne informacije za pripremu i realizaciju poduzetničkih ideja.

Usporeni razvoj BiH uticao je na mnoge tokove, a posebno privredne.

Stoga je od posebnog značaja uspostaviti sistem edukacije privrednika i ostalih učesnika u procesima obnove i razvoja.

Ovaj program omogućava finansiranje organiziranja seminara, naučno-stručnih skupova, te drugih vidova sticanja znanja od interesa za privredu i zapošljavanje.

Organizacija-primalac: Organizatori manifestacija, izdavačkih projekata i edukacija

Kriteriji: Pojedinačne Odluke Vlade Kantona

3.2. Podrška poduzetništvu za promociju i nastupe na sajmovima

Iznos: 70.000,00 KM

Svrha:

Gubitak tržišta, te povratak povjerenja kupaca za mnoge privredne subjekte predstavlja jedan od najvećih problema.

Bez osmišljene promocije teško je očekivati povratak na izgubljena tržišta. Zbog nedostatka resursa mnogi privredni subjekti nisu u mogućnosti da obezbjede marketinške aktivnosti.

Stoga je bitno, kao i do sada, realizirati ovaj Program i pokušati barem djelimično sufinansirati ovu vrlo značajnu djelatnost, kao što su sajmovi ZEPS.

U takvim nastojanjima Ministarstvo će nastaviti obogaćivanje i izradu promotivnih publikacija. Sredstva su predviđena i za nastup privrednika i Zeničko-dobojskog kantona na sajmovima.

Organizacija-primalac: Asocijacije privrednika i promotori Zeničko-dobojskog kantona

Kriteriji: Prema konkretnim programima asocijacije privrednika i Odlukama Vlade Kantona

3.3. Program afirmacije domaće proizvodnje, kupoprodaje i turizma

Iznos: 25.000,00 KM

Svrha:

Budući da privreda Zeničko-dobojskog kantona ima respektabilna poslovna iskustva sa ino-privredom, takva tradicija je nastavljena. U 2011. godini pokrivenost uvoza izvozom u Zeničko-dobojskom kantonu je oko 93,25%. Međutim, struktura izvoza, odnosno uvoza je nepovoljna, što stvara uslove za agresivan nastup ino-kompanija na našem tržištu.

Nakon okončanja procesa privatizacija privrednih subjekata u oblasti trgovine, a posebno poslije dolaska velikih trgovačkih subjekata „Konzum“ Hrvatska, „Mercur“ Slovenija, „Megle“ Njemačka i drugi), bh-potrošač je suočen sa ino-ponudom i agresivnim marketing kompanijama, pri čemu su domaći proizvođači i potrošači pod neprekidnim pritiskom.

U ovoj borbi za potrošača koriste se razna sredstva.

Imajući u vidu prethodno, Ministarstvo za privredu ima namjeru realizirati programe afirmacije domaće proizvodnje.

Bitno je napomenuti da se realizacija ovog projekta dešava u trenutku liberalizacije trgovinskih odnosa sa zemljama u okruženju što uvećava njegov značaj.

Ovaj program je u uskoj vezi sa politikom subvencioniranja uvođenja međunarodnih standarda za kvalitet.

Očekivani efekti ovog programa su povećana tražnja za domaćim proizvodom, zapošljavanje, i ostalo.

Organizacija – primalac: Tehnički organizator

Kriteriji: Javni poziv, Odluke Vlade Kantona

4. SISTEM POTICAJA ZA START-UP BIZNISE

4.1. Subvencioniranje administrativnih troškova kod izgradnje proizvodnih objekata

Iznos: 550.000,00 KM

Svrha:

Sredstva za subvencioniranje administrativnih troškova proizvodnih investicija (izgradnja proizvodnih objekata) obezbjeđuju se Budžetom Zeničko-dobojskog kantona i planiraju Programom utroška sredstava u Ministarstvu privrede, za tekuću godinu u kojoj se vrši dodjela podsticaja, te odgovarajućom odlukom koja na godišnjem nivou regulira pitanje obezbjeđenja sredstava i za tu godinu važećih, kriterija i načina realizacije transfera.

Radi obavještanja korisnika o mogućnostima dobivanja sredstava poticaja odluka se objavljuje u sredstvima javnog informiranja u formi javnog poziva za dodjelu podsticajnih sredstava na oficijelnoj web stranici Kantona.

U cilju intenziviranja investicija u područje proizvodnih djelatnosti, a samim tim zapošljavanja i razvoja, Vlada Kantona će subvencionirati dio slijedećih troškova investitora:

1. Naknade za građevinsko zemljište,
2. Naknade za pretvaranje poljoprivrednog u građevinsko zemljište,
3. Priključne takse (vodosnabdijevanje, električna energija, grijanje, plin, telefon i dr.),
4. Administrativne, sudske i druge takse, i
5. Naknade za rad komisija.

Kriteriji i procedure za prihvatanje određenog projekta investitora detaljno su obrađeni po "Projektu" – Postupak i kriteriji za odobravanje i dodjelu (refundiranje) sredstava podsticaja namijenjenih subvencioniranju administrativnih troškova kod izgradnje proizvodnih objekata koji je usvojila Vlada Zeničko-dobojskog kantona.

Relevantni propisi na osnovu kojih se zasniva ovaj dio transfera su:

- Zaključak o utvrđivanju Postupka i kriterija za odobravanje (refundiranje) sredstava podsticaja namijenjenih subvencioniranju administrativnih troškova kod izgradnje proizvodnih objekata, koji donosi Vlada Kantona.
- Odluka o istom, koju donosi Vlada Kantona.

Organizacija – primalac: Proizvodni privredni subjekti.

Kriteriji: Projekat – prema javnom pozivu i Odlukama Vlade Kantona.

4.2. Subvencioniranje troškova realizacije patenta inovatora sa područja Zeničko-dobojskog kantona

Iznos: 20.000,00 KM

Svrha:

Na području Zeničko-dobojskog kantona djeluje više inovatora. Oni su organizirani u udruženjima, a na nivou BiH u Asocijaciji inovatora BiH

Najveći problem sa kojim se inovatori susreću je implementacija izuma odnosno patenata. Patent je pravo kojim se štiti pronalazak iz bilo kojeg područja tehnike, pod uslovom da je nov, da ima inovativni nivo i da se može industrijski primjeniti.

Korisnik poticaja će biti nosioci rješenja o dodjeli patenta sa prebivalištem na području Zeničko-dobojskog kantona.

Inovatoru će se, nakon uredno dostavljenog Zahtjeva i provedene procedure odlučivanja odobriti nepovratna sredstva za najviše tri patenta.

Relevantni propisi na osnovu kojih se zasniva ovaj dio transfera:

- Zakon o intelektualnom vlasništvu BiH („Službeni glasnik BiH“, broj: 3/02),
- Zaključak o utvrđivanju Postupka i kriterija za odobravanje i dodjelu sredstava podsticaja namjenjenih subvencioniranju troškova realizacije patenata inovatora sa područja Zeničko-dobojskog kantona,
- Odluka Vlade Kantona o dodjeli podsticaja po svakom Zahtjevu pojedinačno.

Organizacija – primalac: Nosilac Rješenja o dodjeli patenta

Kriterij: Postupak i kriterij iz Javnog poziva

4.3. Subvencioniranje administrativnih troškova i investicija kod obrta

Indikatori: Vrste poticaja; broj dodjeljenih poticaja; utrošena sredstva; efekti.

Nosilac: Sektor trgovine, razvoja i obrta i Sektor industrije, energetike i rudarstva.

Iznos: 99.000,00 KM

Svrha:

Sredstva za subvencioniranje investicija kod obrta iz područja prerađivačkih djelatnosti obezbjeđuju se iz Budžeta Zeničko-dobojskog kantona za svaku godinu, a planiraju se Programom utroška sredstava u Ministarstvu za privredu, te odgovarajućim odlukama Vlade Kantona kojima se uređuju izdvajanja i transferi prema korisnicima.

Radi obavještanja korisnika o mogućnostima dobivanja sredstava podsticaja odluke Vlade Kantona objavljuju se u “Službenim novinama Zeničko-dobojskog kantona” i sredstvima javnog informisanja, u formi javnog poziva za dodjelu podsticaja, te na oficijelnoj web stranici Vlade Kantona.

Na kraju budžetske godine Ministarstvo će izvjestiti Vladu i Skupštinu Zeničko-dobojskog kantona o realizaciji podsticaja.

U cilju intenziviranja investicija u proizvodne obrtničke djelatnosti i smanjenja administrativnih troškova, a samim tim povećanja zapošljavanja i razvoja, Vlada Kantona će pojedinačno subvencionirati dio troškova za:

1. Pripremu i izgradnju objekta za obavljanje djelatnosti,
2. Nabavku objekta opreme i mašina (stalna sredstva) za obavljanje djelatnosti.

Korisnicima podsticaja, koji se bave djelatnostima sa liste tradicionalnih zanata iz područja D, („Službene novine Federacije Bosne i Hercegovine“, broj: 62/05), ukupan iznos pripadajućih sredstava se uvećava za 5%.

Korisnicima poticaja mladim od 35 godina, računajući na dan podnošenja zahtjeva, ukupan iznos poticajnih sredstava se uvećava za 10%.

Relevantni propisi na osnovu kojih se zasniva ovaj dio transfera su:

- Zaključak o utvrđivanju Postupka i kriterija za odobravanje i dodjelu sredstava podsticaja namjenjenih za subvencioniranje investicija kod obrta iz područja prerađivačkih djelatnosti.
- Odluka o istom, koju će donijeti Vlada Kantona.

Organizacija – primalac: Obrtnici

Kriteriji: Projekat – prema javnom pozivu i Odlukama Vlade Kantona.

5. POTICAJ IZVOZNO ORJENTIRANIH AKTIVNOSTI

Indikatori: Razina izvoza; odnos izvoza i uvoza; broj izvozno orjentiranih preduzeća; stepen rasta izvoza.

Nosilac: Sektor industrije, energetike i rudarstva i Sektor trgovine, razvoja i obrta

5.1. Subvencioniranje uvođenja međunarodnih standarda za upravljanje kvalitetom

Iznos: 380.000,00 KM

Svrha:

Privreda Zeničko-dobojskog kantona ima dugu i uspješnu tradiciju u izvozu proizvoda i usluga na evropsko i svjetsko tržište. Ulaskom Hrvatske u EU, izvoznici će biti suočeni sa velikim problemima.

Posljednjih dvadeset godina došlo je do značajnih promjena uslova u poslovanju sa ino-partnerima. Globalizacija i donošenje međunarodnih standarda, te ratne štete, bitno su zaustavile razvoj bh-izvoznika. Na ovaj način njihova konkurentna pozicija je znatno oslabljena.

Dosezanje izgubljenih pozicija predstavlja vrlo važan zadatak svih subjekata zajednice. Stoga se Vlada Kantona opredjelila za poticanje uvođenja međunarodnih standarda za upravljanje kvalitetom, kao jednog od uticajnih faktora bržeg pristupa ino-tržištu. U tom smislu bit će podržano uvođenje međunarodnih standarda kao što su HALAL, FSC i HASAP i drugih, te standarda za certifikaciju proizvoda.

Relevantni propisi na kojima se zasniva ovaj poticaj:

- Zaključak o utvrđivanju Postupka i kriterija za odobravanje i dodjelu sredstava podsticaja namjenjenih subvencioniranju uvođenja međunarodnih standarda za upravljanje kvalitetom, koji je donijela Vlada Kantona.
- Odluka o opredjeljenju ukupnih sredstava za realizaciju ovog podsticaja,
- Pojedinačne Odluke Vlade Kantona o dodjeli podsticaja svakom korisniku pojedinačno.

Organizacija – primalac: Privredni subjekt

Kriteriji: Postupak i kriterij – prema Javnom pozivu i Odlukama Vlade Kantona.

5.2. Regresiranje kamata na investicijske kredite

Iznos: 550.000,00 KM

Svrha:

Sredstva za regresiranje kamata obezbjeđuju se Budžetom Zeničko-dobojskog kantona i planiraju Programom utroška sredstava u Ministarstvu privrede, za tekuću godinu u kojoj se vrši dodjela poticaja, te odgovarajućom odlukom koja na godišnjem nivou regulira pitanje obezbjeđenja sredstava i za tu godinu važećih, kriterija i načina realizacije transfera.

Radi obavještanja korisnika o mogućnostima dobivanja sredstava poticaja odluka se objavljuje u sredstvima javnog informisanja u formi javnog poziva za dodjelu poticajnih sredstava i na oficijelnoj web stranici Kantona.

U cilju intenziviranja investicija u oblasti proizvodnih djelatnosti putem investicijskih kredita, Vlada Kantona će regresirati dio uplaćenih kamata. Na ovaj način se očekuje intenziviranje upošljavanja.

Regresiranje kamata se neće odobriti za kredite ili dio kredita koji su namijenjeni reprogramiranju drugih kredita.

Kriteriji i procedure za prihvaćanje određenog projekta investitora detaljno su obrađeni u "Projektu" – Postupak i kriteriji za odobravanje i dodjelu (refundiranje) sredstava podsticaja namijenjenih regresiranju kamata na investicijske kredite.

Relevantni propisi na kojima se zasniva ovaj dio transfera su:

- Zaključak o utvrđivanju Postupka i kriterija za odobravanje i dojelu (refundiranje) sredstava podsticaja namijenjenih regresiranju kamata na investicijske kredite, koji donosi Vlada kantona.
- Odluka o istom, koju donosi Vlada Kantona.

Organizacija – primalac: Proizvodni privredni subjekti

Kriteriji: Projekat – prema Javnom pozivu i Odlukama Vlade Kantona.

6. IZRADA STRATEGIJE RAZVOJA TURIZMA U ZDK

Iznos: 50.000,00 KM

Svrha:

Izrada strategije ili nekog drugog strateškog razvojnog plana potreba je svake regije-kantona koja želi planski razvijati turizam na svom području i u skladu s postojećom infrastrukturom i turističkim potencijalima biti konkurentna na tržištu.

Svrha ovog dokumenta je da postavi strateške osnove za razvoj turizma u Kantonu, podigne kvalitet turističke ponude, promovira turističke kapacitete i da se regionalno uveže sa srodnim regijama u upotpunjavanju turističke ponude.

Indikatori: Usvojena Strategija

Nosilac: Sektor trgovine, razvoja i obrta

Organizacija – primalac: Proizvodni privredni subjekti

Kriteriji: Projekat – prema Javnom pozivu i Odlukama Vlade Kantona.

7. PODIZANJE KVALITETA TURISTIČKE PONUDE

Indikatori: Brošure, posjete WEB. stranici, broj posjetilaca. broj prezentacija na sajmovima, broj kreiranih marketinških alata i kampanja.

Nosilac: Sektor trgovine, razvoja i obrta.

7.1. Revitalizacija Kraljevskog grada Bobovca

Iznos: 66.000,00 KM

Svrha:

U raznolikom i bogatom fondu kulturno-historijskog naslijeđa Bosne i Hercegovine utvrđeni gradovi zauzimaju posebno mjesto. U odnosu na ostale gradove, po svome značaju i arhitektnoskoj kompleksnosti, izdvaja se srednjovjekovni kraljevski grad Bobovac, koji je 2002. godine proglašen nacionalnim spomenikom Bosne i Hercegovine. Bobovac je bio prijestolnica bosanskih vladara od vladavine bana Stjepana II Kotromanića do prestanka bosanske samostalnosti (prva polovina XIV stoljeća – 1463. godina). Bobovac je jedini srednjovjekovni grad – utvrđenje u Bosni i Hercegovini čiji je vladarski dvor u cjelini istražen i predstavlja karakterističan primjer srednjovjekovne arhitektonske i urbanističke cjeline, savršeno uklopljene u prirodni ambijent. Brojni arheološki ostaci svjedoče o životu najviše bosanske vlastele integrirane u onovremenu evropsku kulturu. Turistička i obrazovna vrijednost je vrlo velika, jer se adekvatnom prezentacijom, na kompletno istraženom lokalitetu, može upoznati sa materijalnom kulturom i političkom historijom srednjovjekovne samostalne bosanske države.

U početnoj fazi projekti na Kraljevskom gradu Bobovcu obuhvataju rekonstrukciju prilazne staze do mauzoleja na Kraljevskom gradu, odnosno da se na prilaznoj stazi uradi popločavanje prilaznog puta od kamenih ploča, kao i izgradnju drvene brvnare koja bi isključivo služila kao „Suvenirnica“ i za fizičko obezbjeđenje na Kraljevskom gradu te za zadovoljenje ostalih potreba turista koji pohode ovu turističku destinaciju (informacije, ponude, takse, mini izložbe suvenira, itd.).

Cilj ovih projekata je očuvanje, zaštita i unapređenje kulturno – historijske baštine, s posebnim naglaskom na stavljanje u kontekst turističke ponude Kraljevskog grada Bobovca, a s ciljem nesmetanog odvijanja turističkih aktivnosti i razvoja turističke ponude na području općine Vareš. Istim će biti snažno podržan razvoj kućne radinosti i zapošljavanje velikog broja mještana koji gravitiraju Kraljevskom gradu Bobovcu i šire, na izradi suvenira i proizvodnji zdrave hrane.

Organizacija – primalac: Općina Vareš

Kriterij: Prema odlukama Vlade Kantona.

7.2. Priprema izgradnje Historijskog parka srednjovjekovne Bosne u općinama Zenica, Kakanj i Visoko

Iznos: 35.000,00 KM

Svrha:

Prema zvaničnim statističkim podacima udio broja turista i turističkih noćenja evidentiranih u Zeničko-dobojskom kantonu, u odnosu na Federaciju Bosne i Hercegovine, tokom posljednjih nekoliko godina je na vrlo niskom nivou, te ima nepromjenjiv trend. Ova konstatacija se odnosi na sve općine u Kantonu, izuzev na općine Visoko i Tešanj.

Argumenti za slabu zainteresiranost turista za gradove iz Zeničko-dobojskog kantona, mogu se tražiti u nizu razloga, a među osnovnim je pitanje turističke ponude.

Bez obzira na činjenicu što svaki od gradova u Zeničko-dobojskom kantonu ima svoje vrlo značajne kulturno-historijske specifičnosti, one nisu na odgovarajući način predočene široj javnosti.

U ovom slučaju fokusirane su neke istorijske vrijednosti u općinama Zenica, Kakanj i Visoko, koje su deponovane u muzejskim zbirkama, a istovremeno predstavljaju kulturno-historijske temelje Bosne i Hercegovine i posebnosti ovih općina.

To se prije svega odnosi na predmete i dokumente od posebnog značaja, kao što su:

- Zgoščanski stećak,
- Kruna bosanskih kraljeva,

- Povelja Kulina Bana,
- Zlatnik Kralja Tvrtka,
- Pečat Kralja Tvrtka,
- Srednjovjekovni grb,
- Ploča sudije Građeše,
- Bilinopoljska izjava Kulina Bana i sl.

Cilj ovog projekta je da se u svakoj od pomenutih općina uredi odgovarajući zemljišni prostor u koji bi se instalirale replike navedenih predmeta i dokumenata u adekvatnoj razmjeri, te na taj način formira Istorijski park srednjovjekovne Bosne.

Izvršen je izbor najboljeg idejnog rješenja, a tokom godine je planirano provođenje postupka projektovanja. Ovim će biti stvoreni uslovi za početak izgradnje objekta.

Realizacijom ovog projekta realno je očekivati znatno povećanje interesa turista u pomenutim gradovima Kantona čime bi se postigli i drugi sinergetski efekti.

Organizacija – povjerioci: Izvođači projektne organizacije

Kriterij: Prema Javnom pozivu i Odlukama Vlade Kantona

8. PROMOCIJA TURISTIČKIH KAPACITETA ZDK

Indikatori: Brošure, posjete WEB. stranici, broj posjetilaca. broj prezentacija na sajmovima, broj kreiranih marketinških alata i kampanja.

Nosilac: Sektor trgovine, razvoja i obrta.

8.1. Subvencioniranje povećanja iskorištenja kapaciteta u hotelima

Iznos: 15.000,00 KM

Svrha:

Prema podacima Agencije za statistiku BiH, Bosnu i Hercegovinu u toku 2010. godine posjetilo je 656.333 turista i ostvareno je 1.416.691 noćenje turista. Zeničko-dobojski kanton, a prema podacima Turističke zajednice Zeničko-dobojskog kantona, u toku 2010. godine posjetilo je ukupno 16.066 turista, odnosno 2,45% u odnosu na Bosnu i Hercegovinu, te ostvaren broj noćenja u toku 2010. godine je 26.706, odnosno 1,9% u odnosu na Bosnu i Hercegovinu. Analizirajući podatke ostvarenog broja noćenja domaćih i stranih turista na području Zeničko-dobojskog kantona za period 2005.-2010. godine, evidentno je da se broj noćenja od 2005. godine povećavao zaključno sa 2008. godinu od kada se bilježi pad broja noćenja turista. Proječno zadržavanje turista u Zeničko-dobojskom kantonu je oko 2 dana.

U cilju povećanja stepena iskorištenja smještajnih kapaciteta u hotelima i motelima, kao i zbog niza drugih sinergetskih efekata, Vlada Kantona će organizatorima (hotelima, motelima i turističkim agencijama) subvencionirati dio troškova za smještaj i boravak turističkim grupama u hotelima i motelima na području Zeničko-dobojskog kantona, počev od 01.01.2012. godine.

Pod turističkom grupom, u duhu ovog postupka i kriterija podrazumjeva se grupa od 5 i više lica koja organizovano koristi uslugu u hotelu/motelu. Pod smještajem i boravkom turističke grupe, u duhu ovog Postupka i kriterija, podrazumjeva se dvodnevni smještaj i boravak (dva puna pansiona ili dva polupansiona) u jednom objektu, uredno evidentiran nakon 01.01.2012. godine.

Sredstva za subvencioniranje povećanja iskorištavanja kapaciteta u hotelima i motelima na području Zeničko-dobojskog kantona, obezbjeđuju se iz Budžeta Zeničko-dobojskog kantona za 2012.

godine, a planiraju se Programom utroška sredstava u Ministarstvu za privredu, te odgovarajućim odlukama Vlade Kantona kojima se uređuju izdvajanja i transferi prema korisnicima.

Visina poticaja je 10% ukupnog iznosa troška boravka turističke grupe po cijeni punog pansiona od 80 KM i cijeni polupansiona od 60 KM, od čega u slučaju zajedničkog angažmana 50% poticaja pripada turističkoj agenciji, a 50% hotelu/motelu. Ukupna visina poticaja po jednom hotelu/motelu ne može biti veća od 20.000,00 KM godišnje.

Radi obavještanja korisnika o mogućnostima dobivanja sredstava poticaja odluke Vlade Kantona objavljuju se u "Službenim novinama Zeničko-dobojskog kantona" i sredstvima javnog informisanja, u formi javnog poziva za dodjelu poticaja, te na oficijelnoj web stranici Vlade Kantona.

Na osnovu Izvještaja i mišljenja Komisije, Ministarstvo za privredu predlaže Vladi Kantona donošenje Odluke o odobravanju poticaja. Pojedinačne odluke Vlada donosi shodno raspoloživim sredstvima za tekuću godinu, a prednost u odobravanju sredstava poticaja ima onaj korisnik koji je ranije podnio zahtjev i za koji je utvrđeno da ima ispunjene uvjete te zadovoljava kriterij dodjele. Ukoliko se prije isteka budžetske godine utvrdi da raspoloživa budžetska sredstva nisu dovoljna, dio zahtjeva se, po prethodnom očitavanju aplikanta, može prenijeti u narednu godinu i u tom slučaju rješava se u skladu sa mogućnostima i kriterijima koji budu usvojeni za tu godinu. Realizacija ovog dijela poticaja bit će obavljena prema podnesenim zahtjevima organizatora, te nakon donošenja Odluke Vlade Kantona po svakom pozitivno ocjenjenom zahtjevu.

Organizacija – primalac: Privredni subjekti iz Zeničko-dobojskog kantona (turističke agencije, hoteli i moteli) registrovani za obavljanje djelatnosti smještaja i pružanja ugostiteljskih usluga turističkim grupama u kategorisanim objektima

Kriterij: Prema odlukama Vlade Kantona.

REKAPITULACIJA

Rb.	NAZIV PROGRAMA	Iznos sredstava KM
1.	IZRADA STRATEGIJE RAZVOJA ENERGETIKE U ZDK	50.000,00
2.	RAZVIJANJE POSLOVNO-PREDUZETNIČKE INFRASTRUKTURE	60.000,00
3.	PROMOCIJA PODUZETNIŠTVA I PODUZETNIČKE KULTURE	125.000,00
3.1.	Program finansiranja manifestacija, izdavačkih projekata i edukacije	30.000,00
3.2.	Podrška poduzetništvu za promociju i nastupe na sajmovima	70.000,00
3.3.	Program afirmacije domaće proizvodnje, kupoprodaje i turizma	25.000,00
4.	SISTEM POTICAJA ZA START-UP BIZNISE	669.000,00
4.1.	Subvencioniranje administrativnih troškova kod izgradnje proizvodnih objekata	550.000,00
4.2.	Subvencioniranje troškova realizacije patenta inovatora sa područja Zeničko-dobojskog kantona	20.000,00
4.3.	Subvencioniranje administrativnih troškova i investicija kod obrta	99.000,00
5.	POTICAJ IZVOZNO ORJENTIRANIH AKTIVNOSTI	930.000,00
5.1.	Subvencioniranje uvođenja međunarodnih standarda za upravljanje kvalitetom HASAP, FSC, HALAL	380.000,00
5.2.	Regresiranje kamata na investicijske kredite	550.000,00
6.	IZRADA STRATEGIJE RAZVOJA TURIZMA U ZDK	50.000,00
7.	PODIZANJE KVALITETA TURISTIČKE PONUDE	101.000,00
7.1.	Revitalizacija Kraljevskog grada Bobovca	66.000,00
7.2.	Priprema i izgradnja Historijskog parka srednjovjekovne Bosne u općinama Zenica, Kakanj i Visoko	35.000,00
8.	PROMOCIJA TURISTIČKIH KAPACITETA ZDK	15.000,00
8.1.	Subvencioniranje povećanja iskorištenja kapaciteta u hotelima	15.000,00
UKUPNO:		2.000.000,00

Dakle, Ministarstvo je planiralo realizaciju više projekata u 2012. godini. Njihov karakter je specifičan, naročito kod poticaja.

Imajući u vidu činjenicu da će realizacija zavisiti od prijavljivanja potencijalnih korisnika, odnosno njihovog interesa, planirana sredstva se mogu prelijevati iz projekta u projekt.

Broj: 02-_____/12.
Datum, 28.06.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Ministarstvo za privredu,
1x Ministarstvo finansija,
1x a/a.